

Statut Mostara predstavlja čvrstu osnovu za budućnost

Kao što je Upravni odbor Vijeća za implementaciju mira konstatirao na sastanku koji je održan u decembru 2003. godine u Briselu "Upravni odbor će pružiti svoju punu podršku u provedbi rješenja koje se odnosi na Mostar, zasnovanog na jedinstvenoj gradskoj upravi sa efikasnim mehanizmima kojim se garantuje odgovarajuća zastupljenost u organima vlasti i spriječava da bilo koji narod ima većinsku kontrolu u Gradskom vijeću."

Imajući ovo u vidu, ambasadori zemalja članica Upravnog odbora Vijeća za implementaciju mira u potpunosti podržavaju odluku visokog predstavnika kojom se donosi novi Statut grada Mostara. Ovo predstavlja krajnji ishod gotovo jednogodišnjih napora koje su uložili domaći organi vlasti, uz pomoć međunarodne zajednice, u cilju uspostave nove organizacije grada Mostara, koja će ujediniti građanje Mostara i prekinuti njihovu administrativnu podijeljenost. U duhu kompromisa, druga Komisija za reformu grada Mostara je uspjela usaglasiti većinu pitanja, ali ne i svih, koja se rješavaju novim Statutom grada Mostara. Visokom predstavniku je preostalo da iznađe rješenje za neusaglašenih 10% u vezi sa pitanjima o kojim nije bilo moguće postići kompromis. Odluka visokog predstavnika je donesena u interesu svih građana grada Mostara u cjelini.

Ambasadori apeliraju na građane Mostara, političare, državne službenike i javne uposlenike da učine sve što je u njihovoj moći kako bi osigurali da se novi Statut grada blagovremeno i efikasno implementira. Na taj način će dužnosnici, a isto tako i građani Mostara pomoći da se osigura da predstojeće ponovno otvaranje Starog mosta predstavlja više od simboličnog ponovnog ujedinjenja Grada. To će biti stvarno premošćivnje podjela koje predugo traju, a isto tako će znatno povećati potencijal grada Mostara za privlačenje i stranih i domaćih investicija, te ponovo uspostavljanje Mostara kao značajne turističke destinacije.